



إبداعات

# يادوب تلحق

شعر

محمود عبد الباسط

## إبداعات

اسبوعية / العدد ١٧٥

يادوب تلحق

شمر / محمود عبد الباسط

- تصميم الغلاف : رأفت محيى الدين
- موتيف الغلاف للفنان : إسلام خليفة
- الموثقات الداخلية : غريب ندا
- المراجعة اللغوية : عادل سميح

• الطبعة الأولى :

رقم الإيداع : / ٨٥٥٣ / ٢٠٠٣

الترقيم الدولي : 9 - 448 - 305 - 977 I.S.B.N:

• المراسلات : باسم رئيس التحرير

على العنوان التالى

١٦ أش أمين سامى - قصر العيني

رقم بريدى : ١١٥٦١

• الطباعة والتنفيذ : الشركة الدولية للطباعة

المنطقة الصناعية الثانية

قطعة ١٣٩ - شارع ٣٩ - مدينة ٦ أكتوبر

ت : ٨٣٣٨٢٤٤ - ٨٣٣٨٢٤٢ - ٨٣٣٨٢٤٠

e-mail: pic@6oct.ie-eg.com



الهيئة العامة  
لقصور الثقافة

رئيس مجلس الإدارة

أنس الفقى

رئيس التحرير

فؤاد قنديل

أمين عام النشر

محمد السيد عيد

مدير التحرير

محمود الحلوانى

الإشراف العام

فكرى النقاش

سكرتير التحرير

عزت إبراهيم

الإشراف الفنى العام : غريب ندا





## عاجز نظر

بس النظر مش ضى ولا صوره  
أنا المسك وأحسن طبعك  
أعرف ف طعم الروح من الريحه  
يا ما خلايق تضمنى لصدرها  
بجته بارده وروحها زى الثلج  
ياما خلايق من حرارة كفها  
تحس طعم الاشتياق والونس

سميع لأصوات البشر  
دا صوت كأنه،  
رنة الوتر الحزين  
دا « تشلو » غليض محترم  
دا « بوق » على الفاضى

نغمات بشوفها ف عتمتى  
مزازيك ف ودنى كل يوم  
ف مش عجيبه لما أضرم العود ،  
وادندن .

سهران لىالى تباعاً  
لا شفت صبحى ولا ،  
عارف ملامح ضى  
لكنى بفرح للصباح ،  
وفيه بكمل سهرتى  
وساعات كده . . . . .  
بيجلى إحساسى الشقى  
إنى ها فتح فجأه ع الدنيا  
أضبطها ليا بتبتسم ،  
فخاف قوى . . .  
وأجرى أستخى ف عتمتى .

عارف بأن الدنيا بنت متغذره  
سابقه ف دلالتها وكل الخلق شاغلوها  
خائف أشوف دنيتي تطلع كده « مكعبره »  
يبقى العمى أحسن ،  
من شوف طشاش وقتها .

حافظ شارعنا بالحفر  
وأصحابى بالقهوة وبالنكته  
وأعرف بلدنا ع الخريطة وحدودها  
وألمس بإيدى النيل وأملس ع الشجر  
ويقولوا قال عاجز نظر .





## سلمى

بكتبك من قبل ما تكبرى  
وتبصّى ع الدنيا بعين الجد  
حاولى تكونى صغيره ،  
على قد ما تقدرى  
واتعلّمى ف الكلام  
على أقل من مهلك .

ما أجمل التهنئه على شفايفها  
بنت التلث سنوات  
بتعلم العبارات براءتها .

سلمى سلام القلب  
هى دفى الأيام وبهجتها

---

هئ حبيبة قلب جدتها  
لما تصلى تشد طرحتها  
ولما تسجد . . . سلمى بتسبح

بعترتى أشياءنا القديمة كلها  
خرجتى قلب الأوضه ف الصاله  
عملك م الورق جدو ،  
سفينه وبيت وطياره  
ولو تقعد على السفره  
تبعترع الملايكه الرز  
شقاوتها ترقص قلب جدتها  
من الفرجه  
وبتغمض عيون سلمى ،  
عشان ها تنام  
وبرضه شقيه ف الأحلام

بتبقى سلمى نجمايه  
بتلعب ويا كام نجمه  
يشب الضى والقمره  
يشوف بسمه ،  
ما يشوفهاش على الدنيا  
فبيصاحبك . . . . يبوس خدك  
ويعمل نفسه بلونه ما بين كفك  
وتبدأ لعبة القمرايه والنجمات  
مع بنت التلث سنوات  
ومين يقدر يقولك  
اكبرى دلوقت  
كده إنت ملكتي الوقت  
كده إنت ملاك دلوقت

إوعاكى زى الدنيا متسرّبعه  
حاولى تكونى صغيره  
على قد ما تقدرى  
واتعلمى ف الكلام على أقل من مهلك .

## عربية فول

وأخيرًا . . . بلاقيك  
بعد ما دُوخْت عليك  
ف كل القطر المصرى  
بتسيب الدنيا تضرب تقلب  
واقف تفطر،  
على عربية فول ف«الموسكى»  
سبحان من جمع دى المخاليق  
حولين عربية فول  
وكأنه مقام سيدنا  
بتدش دماغ البصله ،  
دماغ الدنيا اللى معانده  
تمزع ف رغيفك نصين  
ويلهلب طبق الفول

بُهارات الهند... شطه وفلفل  
يولع جوفك بالآه فتن  
ويسموه الناس الفن !  
عيك.....  
إنك ظابط ساعتك ع الدنيا  
ف الوقت اتأخر بيك  
من غير جمهور ولا حاجه  
تقفل ستارتها الدنيا عليك  
ولساك بتشخص  
دور المهزوم والشاعر  
مع إنك مش مكتوبلك دور  
واهو لنا زمان  
بندور ليك على صوره  
وما نلقهاش !

دائماً تظهر ف « الكدر »  
وتهرب م « النيجاتيف »  
يظهر إنك مش موجود من أصله

وأهو كل الورق اللي اتحبر  
ومليته كتابه ،  
مفروش تحتيك  
قراطيس للـب  
بتلّمع بيه فترينه قزاز ،  
جواها البدله البنى  
البدله البنى . . فاكرها ؟  
وأهو طبق الفول قرب يخلص  
وانت ما نطقتش ولا كلمه



شايك زعلان  
ياخي سييك...  
ملعونه الدنيا  
إيه يعنى لو خدت نشان  
ما هو كله محصل بعضه  
أنا جيت أظمن بس  
وأمضى « أوتوجراف »  
واتأكد إنك موجود وبخير  
واهى فرصه...  
أخدلك صوره  
يمكن تطلع .

## ميت دمه خفيف

يستاهل الرحمه  
ابن الحلال الطيب  
مطيب الجروحات  
نسمه وهبت ع الحياه  
فى منتهى الخفه  
فراشه شربت  
من ربيع الورد والأحزان  
من صبارات الغيطان  
اتفتحت جروحات ولم تتلم  
والله يستاهل

كانت بتحلى دينتك أوقات  
تدخل عليك بالحضن  
فتخاف على جسده النحيل

من نشوة الفرحه  
تُقطر ف عينه الرضا  
وتقبل الجبهه  
وينام ف توب زاهد  
والله يستاهل

كان البطل  
ف المضحكات والمبقيات  
إيه يا سليل المعجزات  
إيه ف الزمن لم تشهده  
هتحت البحر ولا تشربه  
والله يستاهل

بعد التعب غمض عنه  
على آخر حبة ضى

ونزلوا الدمعتين بالراحه  
مش دمعتين الفرح  
ولا دمعتين البكا  
دول دمعتين الراحه  
والله يستاهل  
ميت خفيف الدم وجهه أبتسم  
لما فاض الروح  
هل يا ترى ؟  
دى ضحكة المبتلى ،  
اللى شاف النخل والواحه  
بعد العطش والجوع  
والله يستاهل  
دايمًا كده مستعجل  
كما ضيف حداكم ،

وَحَسَّ رُوحَهُ تَقِيلُ  
حَتَّى فِ نَعْشِهِ خَفِيفُ  
كَانَ مَاشِي يَتَمَخَّطِرُ  
كَيْفَ مَشِيَّتِهِ عَ الْحَيَاةِ  
وَاللَّهُ يَسْتَاهِلُ  
ابْنَ الْحَلَالِ الطَّيِّبِ  
مَطِيبِ الْجُرُوحَاتِ  
الْمَاشِي يَكْتُمُ ضَحِكَتَهُ ،  
وَسَطَ الْجُمُوعِ .

## سواق ترله

كانت ضيخكت لمين ؟  
سكه عجب  
والفردتين نايمين  
سلّبت حملى بالحبال التيل  
حصّنت روى  
البسمله والصمد  
خاف م الحسد  
عضة أسد أرحم  
م البرجله ع الطريق  
يا ربنا سلم  
م العسكر اللى اترص  
أنا اللى با اتكدر .  
ع اللى ساترها الصبح باتوكل

السكة دى مشبره  
السكة دى مغبره  
طول ما انت رجلك ع الطريق  
الروح بتأمل .  
الخلق تُمَرِّق عن يمينى وعن شمال  
أضحك على لعب العيال  
واللى سبق ما سبق  
والسكة بقيالى .  
وترله بوزها حديد  
وأنا اللي باعرفها  
تبان كده مزمجره  
وصحبة الورد الجميل ،  
معطره جوفها

واللى يبات ع الطريق

---

حتماً بيطلع جدع ،  
ويقدّر الصحبه  
لا بد من حبة عُفار  
لا بد من حبة زعيق  
لا الهيه تتفرط

وادی اللى اللى خدته ،  
م الزمان الطویل  
شایب وشایل حمولى  
یا بدوى یا دسوقى



---

فايت على بلادكم جدع  
شادد ف مقطورة وجع ،  
وانتوا الكرام العُدُول  
يا شيالين الحمول  
يا رب تسترها .

## القزم

إيه . . . يا آخينا  
ما تحاسب  
مش شايف يعنى !  
ولا ثبات خطاويك بيغرك  
وبيعمى عنيك  
بتدارى ضحكك المكتومه  
طبعا تتريق على قُصري  
وأنا مين هايقولى ،  
غير شبر ونص  
طب مين هايقوت قفشه تضحك  
وأنا واقف ،  
مش قادر أطول تليفون الشارع  
ولا طایل عتب الأتوبيس

مع إني بشوفك ف الأتوبيس ،  
متعلق .. تَطَّوَح زى عروسه ف خيط  
لكن ما ضحكتش  
واستغرب من طولك ،  
الزائد عن كل حدود  
لو تعرف  
أنا بتصاحب ويا حاجات  
عمرك ما ها تقدر تفهمها  
أنا أكثر منك خفه  
حتى الجاذبيه الأرضيه ،  
بتسطلطفنى  
وعيال الشارع كلها تعرفنى

حافظ كل النكت اللى بتتقال ،  
على قُصْرِي  
وأعرف أتريق على روحى  
أكثر منك  
وأعرف أوقّف فيك  
الضحك على  
إصرارك إني الشبر ونص  
والأدهى ضلك يخيلنى  
رايح . . جاى  
يا آخينا . . حوش ضلك عنى  
لسه بتضحك!  
لسه بتتريق !

وَأَنَا مُمْكِنٌ وَبِكُلِّ بَسَاطَةٍ  
أَتَعَمَدُ أَدُوسَ عَلَى ضَلَاكَ  
وَأَوْجِعُ رُوحَكَ  
وَأَبْقَى سَعَتَهَا أَتَرِيقُ تَانِي  
وَقَوْلُ الشَّيْرِ وَنَصْ .

### يا دوب ... تلحق

طالعه عليك الدنيا ،  
لا نهارها ولا ليلها  
حاجه كده تحيّر  
شقشاق ضيا بهتان  
لا فجر ولا مغرب  
كل الفصول الأربعة ،  
تحضر ف هذا اليوم  
وتبقى عيل وشب وعجوز  
فى لحظه من ثانيه  
وأديك عماك الشوف  
حتى البصيره طشاش  
خَبَط ف أركان البسيطه المدهشه  
لا عصاك تشق الليل ولا النيل

ولا تدلك طريق ولا درب  
إحملها على كتفك قتيل  
- يا ولادی عدونی الطريق  
- يا عم ده مش طريق ،  
دی جناین ورد  
- كده . . . . .  
خدونی ریح السجر ،  
أشکیله من علتی .  
- يا ولادی عدونی دا البحر  
الغمیق  
- يا عم ده مش بحر ،  
دا هدير البشر ،  
فاتوا العمار بعد النهار ما انقطع .  
- كده

طب شبكونى ف ديل جلاليههم  
يمكن نتوه مع بعض  
- يا ولادى عدونى من دى البرك  
- دى مش برك يا عم  
دا دم

كده .....

حل القضا بدرى  
سابق عليكموا النبى لتلحقوا الدنيا  
الدنيا راجعه لورا  
بِتَقْش ف التواريخ  
وتزحزح الأيام على بعضها  
تبقي المدينة كهف ضلمه انفتَح  
كل الصحارى شربت عمايرها  
اتدحرجت أيامنا زى الصخر



تمحى خطاوى السكه تمحى القَطَر  
سابق عليكوا النبی لتلحقوا الدنيا  
الدنيا راجعه لورا  
أيوه ..... جدع  
إشبط ف أول يوم وكلبش فيه  
إوعى الزمان يفلته  
هو النهارده  
آدم ها ينزل حالاً من الجنة  
يفرح معانا بضى أول شمس .

## انت

يا بكرة يا  
يا حلمنا  
ده نيل ده ولا دمننا  
متناش هناك . . . متناش هنا  
كل الأمانى بعتره  
انت بصحيح عبيط  
ولا انت شكلك كده  
انت . . . .  
المفروض أنك مجنون  
او شارب حاجه  
جائز سرقاك السكينه  
لكن . . . .  
بعد التحليل النفسى

« والكنصلتو »  
تطلع أكثر واحد فايق  
ف الدنيا دى  
انت .....  
يا لى عبرت  
اليوم وف إيدك حته عيل  
بتزقه لبكره  
مش عارف تعبر بيه بحر الشارع  
وكأنك ولا رحت .. ولا جيت  
ولا كان صدرك مفتوح للنار  
رايح تحضن بيه أحلى بنات الدنيا  
انت .....  
كنت إزاي شایل على كتفك  
غضب العالم « آر بى چيه »

حاصد بيه عشرين دبابه  
عاجز ليه أدام بترينه  
وعيل ييكى . . . وقولة هات  
انت . . . . .  
اوعه تموت  
اوعه الدمع يان ف عينيك  
لسه الواد متشعبط فيك  
لسه البنت صغار وبتحبي  
محتاجه لتراب رجلك  
انت . . . . .  
ولا طوابير العيش  
هتخلص فيك الصبر  
ولا زحمة أتوبيس  
بتضيّق خُلك

ولا منشئات الأخبار  
تقدر تضحك على دقنك  
بس بتضحك!!  
لما طبيب المستشفى العام بيقولك . . .  
اكتم جرح الروح بالبن .

## قطر « ٣٥ »

كل القطورات البردانه  
بتنام ف محطة مصر  
إلا القطر المذكور أعلاه  
الموجوع أدناه  
القايم عشره ونص وخمسه  
لما بتشخط فيه صفاره  
ييشد الحمل المتسلسل ،  
يتجرجر . . . زى المكسوف من حاجه  
بالعافيه بيلع ف المسافات ،  
ويشق الليل ،  
وف قلبه حبة ناس  
فاضلين من زحمة مصر  
ع البوابة . . . . .

تبعت شبرا الغضبانه عيالها  
بتودعه . . . وتحذّفه بالطوب  
توووووت . . . . يا ولاد الـ .  
لما أوصل طنطا  
هشكيكم للبدوى  
توووووت . . . .  
قطر العتمه  
ياخذ جرحه ف باطه  
ويمشى . . . . .  
بيسر سب ناسه على السكه  
يؤصل آخر خطه ف طنطا  
ينهج حبه  
ويريح خده على القضبان  
ويبص بخوف ،  
للخط الراجع .

## جلا جلا

آدى الكلام أبو جد  
قرب وشاهد معجزات الورد  
الورد آخر معجزاته دبل  
العين عماها الشوف  
الزيف ف قلب الحقيقه ،  
يرقص ويتحنجل  
الضى مش بالشوف  
الضى من لسعته على جلدك  
حرارة شمس ،  
اوعاك من الخيّه  
نور القمر  
يشبه كثير ضى النيون  
لو نمت وبتحلم



بيقطعوا بالإعلانات الحلم  
ريح الحياة تكسرك  
لو لسه عودك صلب  
لو تمثّل وتميل  
تعزفك الدنيا لحنها الراقص  
وتبقى زى الشجر،  
مالك مثيل ف إنتظارك  
تمرق فصول السنه ،  
من بين فروعك  
آخر طموحك ،  
زقزقة عصفور ونس

جلا جلا  
غضبان قوى....

تهتف باسم الحياه  
الموت يرد الهتاف ،  
بالسخرية وبضحكه مكتومه  
جلا جلا  
ساذج قوى .....  
يا للى البراءه بتقتلك  
من فين ملوحة دمعتك  
من بحر ما يبجف .



---


## عبوده

بعيون وليد متحيره  
ببراءه تلمس دنيتك  
أفتح عيونك ع الحياه  
هاتشب أول خطوتك  
ومحيراك السنتين  
فى الدنيا نازل عضعضه  
سؤال محير روحه فيك  
الدنيا دى إيه طعمها  
حلوه كده !  
زى الحاجات السكره  
ولا مرار ممره  
بتعرفك كل الحاجات على نفسها :  
دى مرايه قوم اضحك لها

دى ورده مرسومه على الكرسى  
دى دقن بابا ،  
وده شنب جدو  
دا ضل ماما وهى فى المطبخ  
دا الباب ودى العتبه  
حلوه الحياه .....  
والدنيا لسه يا دوب  
الصاله والكنبه  
بين البكا والضحك ، ترسم شفتك  
علامات تعجب أو غضب  
عبوده كسرت اللعب  
قال إيه عشان ، إزاي لعب  
أرنوب وقطه وأبصر إيه  
من غير سلام ،

أو حتى إذن  
تيجى وتدخل ديتك !  
بابا يكشر « دى شقاوه »  
أما الكبار ليهم حاجات ،  
ما بيعرفوش حاجه .

أهو تانى راجع للعب  
يصالحها ويبوس خدها  
غمض عيونه من التعب  
زى الملاك نام جنبها .



## مذكرات خيال مآته

يوم ما زرعنى جوا الغيط  
كنت باخووف ف العصافير  
يوم ما فردلى دراعى  
كنت مفكر إنى ها طير  
لكن يوم عن يوم أكذلى  
شجر السنط الواقف جنبى  
انى مليش غير بس مكانى  
وإن شوال الخيش على كتفى  
مش جناحات .

عدا وفات أيام ومواسم  
أحسد فيها ضلى الراسم ،  
منى حاجات .



أصله ساعات يغيّب ،  
لما تغيب الشمس  
ولا يبقالي إلا سكاتي وبس .

نزلت مطره بلّت جوفى  
قلب الطينه يسحب عودى  
برضك واقف ما اتحركتش  
واللى اتحرك عصفور زقزق  
جه وادارى عند القلب  
جوا ضلوعى فرش القش  
زقزق دق  
يومها وصاحبى ،  
حسن بأنى مش للغيط  
وان سكاتي

كان مصاحبني ع الوطاويط  
شالني رمانى ،  
تحت السكه . . . فوق السكه  
جنب الصفصافه على الترعه  
من ده بكره  
لُقْم بيتا عيال الناحيه  
لحد ما واحد منهم مَرّه  
جه على وشى بقلمه البوص  
ورسم ضحكه ،  
خدتها منه ،  
وَرُحْتُ مكركر .



## وها يبقى شجره

يا للعجب  
إزاي نشيدك للربيع  
وتموت مكتتب  
شفتك بترمي ورا ضهرك الخلئات  
خلق الميدان واقفه بتتفرج  
مجنون ده . . . ولا عقل  
أزيد من اللازم  
إيه اللي كان مفروض  
إيه اللي كان لازم  
قدمك تغوص في الأرض  
جدرك لسابع أرض  
تفرد ذراعك  
وتبتسم لقرص الشمس

أنا هابقي شجرة  
وهتخرج من تحت باطى فروع  
ومن ساعتها عرفتك  
لما تتألم بتطرح برتقان  
قُدَّام خضار عودك  
المتبت ع الورق  
وقف الخريف عاجز  
الفروع ده زهزه قوى  
باين عليك مبسوط  
ما تاخذنى جنبك . . . ف باطك  
نفسى أنغرس جارك  
يمكن أتعلم  
إزاي أطرح ورود .

## حال الجنائين

الورده قالت للندى  
يرضيك كده ؟  
بتندى صبار الغيطان  
وتفوتنى أنا !  
جوفى يئن من العطش  
أشبع من الريح مطوحه  
خايفه يا صاحبي لا أنتنى  
تدبل فروعى وتنحنى  
أميل على تراب الجنينه ،  
يضمنى .  
رد الندى يا طيبه  
بكره النسيم هيزفلك  
منى القبل

ويزهزه الضحكه اللى غابت ،  
من زمن بس اصبرى  
إوعاكى م الميل اثبتى  
وف كل يوم  
حال الجنائن يختلف  
عود يُنقطف  
ينحط زينه فى الفازات  
بيعه رخيصه ف بترينات  
يدبل هناك  
وبعدا يجى الندى  
يرقرق دموعه ع الإزاز .

## حوض الورد

لجل زيارة (سيد بيه)  
زرعوا الورد  
بس الورد حزين ومغمض  
وطاً دماغه ورافض يضحك  
رافض يشهد زيف اللحظة  
لو بالإيد كان يسحب عوده ،  
ويطلع يصرخ  
« فتُوح بيه » قال ما يصحش ،  
لازم كل الورد يصحصح  
لازم كل الورد يفتح  
شِدْ دماغ الورد بخيط



لازم كله يشب لفوق  
لجل زيارة « سيد به »  
كل الورد صبح مشنوق .

## ساب الجنينه

ساب الجنينه ما حبهاش  
وما قاليناش إيه السبب  
الورد طار ويا الفراش  
بقت السما ألوان عجب

لبلاب وزاحف ع الحيطان  
هربان من السور الحديد  
يامين يقول للفجر بان  
الورد عايز يوم جديد

فايت عيدانه للخلا  
جاب الخريف قبل الأوان  
ف الصبح قام ييكى الندى

ويفيد بإيه كان اللى كان

ساب الجنيه وضلّها  
الورد ملّ الانتظار  
طول عمره شارب مرها  
ولاداقشى منها غير عكار  
ساب الجنيه

## المُنْدَهَش

الورد كان لسه صبي  
لما الهوى يطوّحه  
يفتكّره بيلاعبه  
غفلان بيحسب ،  
حَشْرَجَة دى الريح مرح  
يوم شب طوقه وشب للدنيا  
شاف المسيح مصلوب شهق  
ورد الحقيقه المُنْدَهَش  
مغروس على قبر الرسل  
والمعجزات



## نقباس

(١)

### الضوى

صفصافه حَلَّتْ شعرها  
بتحب على راسك  
وتبوس على خد الترع  
ترسم عيال وبيوت  
وخيال مآته بيتفق وبأ الحمام  
بلدى عليه بالكلام  
ع المصطبه تجارة فقر  
تفطم عيالها ع الحديث والقول  
نقباس (\*) تكمل باقى عشاها كلام

---

(\*) قرية صغيرة من قرى محافظة القليوبية .

فتَّحت عيني ع السؤال  
ليه (أحمد الضوى)  
يدق باكو المعسل ف الهون الحديد  
ويسب ف الماشيين  
الدمعتين . . . ومفرقين  
الدمعتين . . . . ومفرقين  
على طلاق من الدنيا  
مفيش فايده  
الضوى ده مجذوب  
مجدوب لمين يا امه  
تسكت وتبعتنى بصحن طبيخ  
أخويا قال ما عرفش  
وجاب للضوى جلييه  
مجدوب لمين يا آبا

أبويا قال :  
للنور .  
وأنا كنت باتهجا الحروف  
على بال ما فسرت الكلام  
هناك على طرف البلد  
عملوا للضوى مقام .





(٢)

ميغه

وعشان النخل حدانا مشمرخ  
وعشان عبوده أشطر واحد فينا  
ويحفظ ف القرآن ويجود  
كان يعمل م الشماريخ . . الفلكه  
ويجيها هديه للأستاذ ،  
ولا كان يتمدّ ،  
غير ( ميغه بن السنطاوى )  
اللى جعيره سعتها  
كان بيسمّع كل الناحيه  
جاااى ملعون أبو خاش عبوده  
ميغه . . يعزم بهاييم بلدنا  
على فدانين برسيم

وينط سور المدرسه  
من حضن مقام الضوى ،  
بيجيب العمه الخضرا ،  
وصندوق الندر  
ميغه . . كان ييحب الكشرى  
وناديه لطفى  
والسهره الصباحى  
مع السيظه ف مولد الضوى  
والسيما ف الأعياد وبنات لعياد  
ميغه . . رغم العين الواحده  
كان نفسه يشوف الدنيا بحالها  
للعلم . . . .  
بتعريفه هريسه  
كان عبوده يصالح ميغه

ويطَّلَعُ م السَّيَّالَهُ  
العَيْشِ النَّاشِفِ وَالْمَلْحِ  
وعُودِينَ جَعْضِيضِ  
وبَسْمَلَهُ .



## رسم الطباشير

فى المدرسه  
والعيال ع الدكك  
زى اللعب مترصصه  
والفصول زحمة عقول  
والواجب كان  
كراس مليون  
كلمة بكره  
مكتوب بالنسخ وبالرقعه  
والحصه تاريخ  
لكنه تاريخ اليوم  
مكتوب ع الحيط أرقام  
والواد ف الصف الأخرانى  
حاضن درعاه ونام

وبيحلم إن الدكه صاروخ  
والشنته كتاب حواديت  
وانه هايرجع تانى البيت  
من غير ما يعدى على خرابه  
بالطباشيره بيملأ الحيطه كتابه  
وبيرسم شجره ونخله وغيط  
وحاجات كان نفسه تكون  
وياريت.....  
صندوق ملين بلعب وبالون  
زى ما يشوف فى التلفزيون  
وبيرسم بكره خطين بيض  
وما بينهم سكه  
لفرحه وعيد  
ولسه هيشب ويطلع

بيلاقي الخزانه تلسوع ،  
على ضميره  
وبسرعة يفوق من حلمه .

\* \* \*

فى المدرسه . . . . . رن الجرس  
فَزَق الصراخ م الخرس .  
والمدرسه جِبَلَتِ عيال ،  
والمدرسه ولدت عيال ،  
حَضَنُوا الشوارع  
والبيوت لسه على حيطانها  
رسم الطباشير .





## غنوة شط وحيد

متفرّقين .....  
زى الجزاير ف البحور  
كل واحد موج و شط  
كلنا فى البعد مد  
واللى فرّق بينّا خوفنا ،  
وارتيابنا ف بعضنا  
موج يياكل فى شطوطنا  
ونبتعد .....  
ريح تطوّح فى جزوعنا  
ونرتعد .....  
واحتماالات الفراق قبل اللّقا  
خوف يتربص بنا

واحتمال انك تغنى ،  
يبقى صوتك ناى حزين ،  
تسمعه لوحذك وتبكي  
واحتمال انك تصالح دنيتك  
إزاي وفين .  
وانت رافض للتمنى  
والسما تضلل علينا  
غيم وبرق  
يولد الرعب ف عيننا  
ألف سكه .. نتوه ونرجع ،  
مش لبعض  
ما احنا برضه  
لسه بيتا بحور وشط  
ياسفاين ضى عدى.....

وابعتى قارب نجاه  
يا منارات الحقايق ،  
شاورى لنا بالحياه  
علمى قلوبنا بالحياه  
إزاي تغنى .  
علميها إزاي تبوح  
لملمى شطوطنا اللى بعدت  
زى لملمة الجروح

---



---

## فخ

كل المعانى الجميله  
محبوسه فى العبارات  
حتى البحور شطين  
حدين لموج عاتى  
وبلاقى نفسى وحيد  
مملُكشى غير قلمى  
وصفحه بيضه مسطره  
أكتب . . . وأكتب  
لحد ما شح المداد  
خلص الورق منى  
وكلامى ما بيخلص  
مين اللى حط الحدود ،

حتى لياض الصفح ؟  
هامش يضيق على كل أحلامى  
واقف على حدود الورق  
دا سلك شايك وبعده ليل غميق  
يا ليل . . . . ما كفنيش البياض  
ولا صدى الغنوات اللى باغنيها  
شالتنى م الوحدة  
وبتستحال السطور سجنى وقضبانى  
وأنا اللى ساذج  
وقال . . . . . بغنى للعصافير

## أنا مش هنا

أنا تهت منك فى الحروف  
ووقفت زنهـار الألف  
عوجتني يائك وانحنيت  
جرّنتي رائك  
فى حوارى التجربه  
صادتني صادق  
من على سن الهرم  
ضممتني ميمك للمدى  
متدوريش !!  
أنا ف حضنك مش هنا .





## على الهوا.... الموت في غزه

دا موت بجد  
مش سيما ولا « أكشن »  
دا دم  
مش خدعه بصريه  
ببساطة ... تحضن غنوتك وتنام  
وكان بكره ها تصحى للدنيا  
ويعرفوك ... « إرهابي »  
نزعت قلبك بالدم  
ورميته ع الدنيا  
مش أمر صعب ،  
انك تموت دلوقت  
القهر والإجباط سبل عينك .. غمض  
مش موتك انت ع الهوا يتذاع  
دا موت ضمير واقف بيتفرج



---

## فزوره

بيقوم م النوم ،  
على ريحة موت  
ويغسل وشه ،  
بحبة ميه ف كفه  
ويلبس مريسته الصفرا  
ويفطر من كحك الرحمه  
متكحل بتراب السكه  
لو يحلف.....  
يحلفلك على عضم التربه .  
ومذيعه واقفه بتسأل :  
نفسك يا حبيبي تطلع إيه ؟  
تفتكروا ما بيردش ليه ؟



## المواطن عكاشه

طلب عرضحال ،  
عليه دمنه ميري بياناته كامله  
ومش طالب أكثر  
من إنك تأثر عليه بالموافقه  
وكل اللي طالبه :  
حسابي وهاروح  
لأنني زهقت  
ومش ناوي أبقى ،  
مواطن لحد  
ومرفق بطيه :  
بطاقتي . . شهادتي  
وحبة ورق  
من عبطي كتبتّه  
خدوا مش عايزهم

وسيبوا الهدوم اللى ساتره البدن  
علشان مسألة إنسانيه وكرامه  
أقولك . . . خدوها ،  
كده برضه أحسن وآخر طراوه  
وأيه يعنى ملط !  
كده الناس تقول  
عبيط وانطلق  
كده برضه ليكم ما يبقاش قلق  
أبليس بكلمه  
اصرخ . . . والعن  
تمصمص شفايفك  
وها تقول عبيط  
وعارف لأنك كمسئول كبير  
مزفلط . . . مسبب

شیاکه . . . رقیق  
وأجمل ما فيك  
البدل والقيافه  
فكمل لطافه ،  
ووافق عليه  
لأننى زهقت  
ومش ناوى أبقى ،  
مواطن لحد

ويشفع تاريخى ،  
لطلبى الوحيد  
عكاشه اللى حارب ،  
ومات مرتين !  
وماشى ف جنازته ،



وواخذ عزاه  
وكننت ف صؤانى ،  
مشرّف سيادتك  
وف الانتخاب  
أنا اللى انتخبتك  
بذمة جنابك حاجات مش تضحك !

فسيبك بقى م الخطط والسياسه  
بتيجى تخطط تخطط عليا  
بقيت الحمار المخطط بتاعك  
ففك اللجام والعُما عن عنيه  
وسيينى أبرطع بعيد عن جنابك  
لأنى زهقت  
ومش ناوى أبقى ،

مواطنن لحد  
تقوللى بلادى الجميله وترايها  
سلام لترااب  
عشقت التراب  
عشان الحلاوه اللى فيها بلادى  
أسف التراب  
ومرغت روحى ف حلمه الكبير  
عملته طواجن . . وكلت بضمير  
ولكنى زهقت  
ومش ناوى أبقى  
مواطنن لحد  
ها سيب العمار اللى سموه وطن ،  
وألأزم حدوده  
كده حر نفسى

بلا أى مانع  
ها كون العكاشه الوحيد السعيد  
تقولى انتمائك . . جدودك . . وعاش  
ها قولك كلام الأغانى بلاش  
شقايا اللى رايح بلاش فى بلاش  
لهذا . . وعليه  
إليك البيان العكاشه الأخير  
عكاشه ماعادشى مواطن لديكم  
لأنى زهقت  
ومش ناوى أبقى  
مواطن لحد .

## الفهرس

٥	الاهداء
٧	عاجز نظر
١١	سلمى
١٥	عربية فول
١٩	ميت دمه خفيف
٢٣	سواق ترله
٢٧	القمزم
٣١	يادوب تلحق
٣٥	انت
٣٩	قطر
٤١	جلا جلا
٤٥	عبوده
٤٩	مذكرات خيال مآته
٥٣	وها يبقى شجره
٥٥	حال الجنائين
٥٧	حوض الورد
٥٩	ساب الجنينه
٦١	المندهش
٦٣	نقباس
٦٧	ميفه
٧١	رسم الطباشير
٧٥	غنوة شط وحيد
٧٩	فخ
٨١	أنا مش هنا
٨٣	على الهوا .. الموت فى غزه
٨٥	فزوره
٨٧	المواطن عكاشه

صدر مؤخرًا من هذه السلسلة

- ١٣٧ - ١٤ ج . محمد بخيت  
 ١٣٨ - أشياء تحدث يوميًا . دعاء عبد العزيز  
 ١٣٩ - ياعم عبد الله . وحيد أمين  
 ١٤٠ - أوراد ليست منشقة . مسعود حامد  
 ١٤١ - صيف المدن . أحمد سليمان  
 ١٤٢ - أبدية الثلوج الملونة . نجلاء محرم  
 ١٤٣ - حضن المسك . الطاهر شرقاوى  
 ١٤٤ - موال الصبر والليل . عادل صابر  
 ١٤٥ - احتقان . ممدوح رزق  
 ١٤٦ - لماذا أنت دونهم؟! . عاطف محمد عبد المجيد  
 ١٤٧ - البحر كالعادة . البهاء حسين  
 ١٤٨ - جسد بارد بلا تفاصيل . أحمد قرني  
 ١٤٩ - مخلوقات الليل . حسن عبد العال  
 ١٥٠ - ظل العائلة . عيد عبد الحليم  
 ١٥١ - قف على قبري . محمد داود  
 ١٥٢ - المغيب . حسين عبد الرحيم  
 ١٥٣ - بنت ليل . محمد الفخراني  
 ١٥٤ - لكن التراجيديا غلبتني . مصطفى عباده  
 ١٥٥ - فتنة الزّجاج . السيد رشاد  
 ١٥٦ - الذبيحة . على الفقى  
 ١٥٧ - العطش . أشرف الصباغ  
 ١٥٨ - وشم على ريم الفراغ . خالد أمين حجازي

- ١٥٩ - للأحبة أن يموتوا ..... أشرف عويس  
١٦٠ - لوحذك ..... محمود فهمي  
١٦١ - امرأة تعزف على الأسلاك ..... حسن غريب أحمد  
١٦٢ - دوامة بتحدف غرب الكون ..... حامد أنور  
١٦٣ - مواسم ما بعد العشق ..... محمد جاد المولى العماري  
١٦٤ - ثقب في الهواء بطول قامتي ..... محمد أبو زيد  
١٦٥ - والنار ..... نصر عبد الرحمن  
١٦٦ - وردة لا تبوح ..... عواطف يونس  
١٦٧ - بغداد لا أحد ..... جمال عبد المعتمد  
١٦٨ - الروح تسأم أحياناً ..... محمود أبو عيشة  
١٦٩ - أول شعره بيضا ..... عصام خميس  
١٧٠ - اشتعالات الوداع ..... أحمد كمال زكي  
١٧١ - وردة للخونة ..... محمد عبد النبي  
١٧٢ - ياقوتة البعث ..... جمال محمود النساخ  
١٧٣ - أوراق من ذاكرة الموج ..... محمد حسين  
١٧٤ - البنت والأشياء ..... جلاء الطيرى  
١٧٥ - يادوب تلحق ..... محمود عبد الباسط

الأعداد القادمة :

- ربما كالآخرين ..... أسماء شهاب الدين
- مشاهد من دفتر الذاكرة ..... عصام عبد العزيز
- عناقيد سلوى ..... عبد المنعم العقبى
- أنا مرة أخرى ..... صلاح عبد العزيز
- أحلام مؤجله ..... جرجس عهلى
- الصبح الطيب مات ..... أشرف يونس

/

\* السلسلة غير ملزمة برد أصول الأعمال سواء نشرت أم لم تنشر .

\* ترتيب النشر يخضع لاعتبارات فنية .